

# Twij werelden

Kerstfeest begunt mit n verhoal van Lucas. Ien dat verhoal let Lucas ons twij werelden zain. Eerst wereld van kaizer Augustus. Dat is wereld van politiek, economie en macht. Wel het mainste macht ien wereld?

Dij macht het, reket.

Zien rekensommem binnen hailig. Oet aigen belang is der nog aaltied hunger en armoude ien wereld. Machthebbers down moar. t Binnen net klaine godjes. Dij macht het wordt deur macht bezeten.

Dij macht het, baauw. Om zain te loaten wat of hai veurstelt. Mitdoun gaat veur alles. Dat is thoes ook zo.

Wie hebben apmoal ons aigen stoatus-symbolen thoes. Wat loat wie doar veur stoan? Wel doun wie doar tekort mit?

Wereld van kaizer Augustus is wereld vol onleven, onvree, ongerechtigheid, onbaarmhartegheid.

Den wereld van t kiend ien de kribbe, wereld van Jezus.

Dat is wereld van gerechtigheid en



ds H. Schuur.

vree. Doar gelden aandere verholdens, doar perbaaiern machthebbers wegen

noar mekoar tou te vienden. Doar gaat t om eten en drinken, om n plo-

ats voor vluchtelingen, veur mensen dij aans binnen. Doar is gain roemte veur deel kieken op mekoar.

Dat is wereld van baarmhartegheid, doar genoade en verzoenen veuropgoan as t om verholdens tussen mensen gaat. Doar is aandacht veur mekoar. Doar telt elk mensenleven. Dat is wereld van kiender, perfeten, dreumers. Doar worden verhoalen verteld.

Wereld van t kiend in de kribbe is wereld vol leven, vree, gerechtigheid en baarmhartegheid.

Lucas let ons twij werelden zain.

Veur welke wereld kaais ik, kaizen ie? De keus dij wie moaken het gevolgen veur ons menaier van leven en soamenleven.

Wordt God zien haail zichtbaar?

Kerstfeest gaat om grode dingen. Om haail van God veur wereld.

n leskolde wereld ontdeut en rozen bluien aan dorre takken.

ds H. Schuur, NH. domie ien Zuudwol.